



PM Modi-i Sep 13 nü Mizoram aser Manipur semdangtsü akok

Liverpool-i Alexander Isak pound million 125 agi alizükogo

VOL. XXII ISSUE NO. 320 (ADOK 320)

DIMAPUR

RASEMNÜ (WEDNESDAY)

RONGJUI (SEPTEMBER) 03, 2025 ₹ 5.00

NLA-i asürtem bilemteta tetushi agütsü

Dimapur, September 2, 2025 (TYO): 14 buba Nagaland Legislative Assembly session tenetbuba tenzükba anogo nung Chief Minister Dr. Neiphiu Rio-i taoba Nagaland Governor La. Ganesan asüba bilemteta tetushi agütsüogo.

La. Ganesan-i February 20, 2022 nungi Nagaland nung Governor 21 buba inyaka aru aser August 15, 2025 nü Chennai nung pa arishi tembang.

Asür La. Ganesan ji lennir aser ketdangsür tajung ka liasü. Pa taküm piyong linük tenzuka aru aser nübortem atema inyak ta CM Rio-i ashi.

Asür Ganesan-i Governor inyakdang pa shisatsü agi Nagaland len ani aser Raj Bhavan ya nisung ajak otetba tesem ka kümdaktsü. Ganesan-i Nagaland ajunga sema senzü aser CSOs, sorkar ketdangsürtem aser security forces den ajurutepa sensaksem ta Rio-isa metetdaktsü.

La. Ganesan-i Nagaland nung

Governor meinyakdak West Bengal aser Manipur nung Governor inyaka liasü. Paisa Member of Parliament (Rajya Sabha) kümsük ka inyaka liasü.

Tanü NLA-isa taoba MLA Nungsangyapang nem tetushi agütsü. Asür Nungsangyapang ya August 8, 2025 nü alima nungi pilaa ao.

Asür Nungsangyapang ya October 24, 1950 nü Mopungchuket nung aso aser pa ya saisaponger tajung ka liasü. Pai National level nung Nagaland atema aiben shilem agia liasü ta Nagaland Legislative Assembly Speaker Sharingain Longkumer-i ashi.

Asür Nungsangyapang-i 2003 aser 2008 nung 23rd Impur Assembly Constituency nungi kümsük anaben tashi takok ngua MLA ka ama inyak ta NLA Speaker-isa ashi.

14 buba Nagaland Legislative Assembly züngsemtemi tanü minute ka ola madoki tasür nem akhüm tetushi agüja liasü.

NMSA-i sorkar dangi shidi zülu

Dimapur, September 2, 2025 (TYO): Nagaland Medical Students' Association (NMSA)-i September 1, 2025 nü Nagaland sorkar nem takhangba kar agütsüogo.

Nagaland sorkari COVID mapang contract nung shimokba nisung 280 regularisation asüba sangdong magizüker ta shia NMSA-i September 2, 2025 nü anogo asemububa timi lungkak aitogo.

NMSA-i yashi sorkar dangi shidi züluba nung Department of Health & Family Welfare-i

sangdong agütsüba meyipa agütsü, sanctioned posts ajak Nagaland Public Service Commission (NPSC)/Nagaland Staff Selection Board (NSSB) nem agütsütsü aser NPSC/NSSB ajanga recruitment examinations agütsü nenshia shiogo.

Tanü tashi nung sorkar nungi telangzüba kecha mali anungji NMSA-i lungkak aitba shilem tanabuba tenzüktsüsa akümtsü ta President Pito S Rochill aser General Secretary Bonoto P Zimo nati sangdong ka nung metetdaktsüogo.

Kohima nung ak wara puteta lir

Kohima, September 2, 2025 (TYO): Kohima District kübok P. Khel, Kohima Village nung African Swine Fever (ASF) putetba sülen Kohima Deputy Commissioner B. Henok Buchem-i tetuyuba kar agütsüogo.

ASF azüoktsü atema wara putetba tesemtem shilem ana küma lemsaba Kohima DC-i metetdaktsüogo.

Infected Zone - P. Khel, Kohima Village, ASF putetdak

nungi kilometer ka telongtet.

Surveillance Zone - Tashidak putetdak nungi kilometer ka toktsür kilometer 10 telongtet.

Iba tesem nung ASF wara menatepa moudaktsütsü atema, ak tepsetba noktanger, tangalen nungi ak bener aruba mesüra tangaleni bener aoba noktanger aser ak o akshi shibelenba noktanger ta Kohima DC B. Henok Buchem-i tetuyuba agütsüogo.

Western Sümi teloktemi Foothill Road semdang

Dimapur, September 2, 2025 (TYO): Western Sümi Hoho (WSH), Western Sümi Kukami Hoho (WSKH) aser Western Sümi Youth Front (WSYF) külemi Foothill Road yangluba reprangdanga senzüogo.

Western Sümi teloktemi mapa inyakba nung temulung asüba aser imlaba ama inyakba metetdaktsü. Parnokisa M/s N. Chisho Swu & Sons aser M/s Saramati Construction dang

mapa tajung inyakba atema tenüngsang agütsüogo.

Foothill Road ya kanga tongtipang lir aser iba mapa takok ngua inyaka aruba ajanga nübortemi tamang akar. Iba mapa inyakertemi kasa tangatetba nung inyaka aotsü aser mapatong metembang tashi meranga inyaktsü ayongzüker ta Media Cell, Western Sümi Hoho-i sangdong ka nung metetdaktsüogo.

CM Dr. Rio-i Assembly nung bill 2 benok



Chief Minister Neiphiu Rio-i Mongulbarnü monsoon session tenzükba anogo nung jempiba noksa nung angur. (Kohima, Sept. 02, 2025)

Kohima, September 2, 2025 (TYO): Nagaland Chief Minister Neiphiu Rio-i Mongulbarnü monsoon session tenzükba anogo nung government bills ana benokogo.

CM Rio-i benokba bill anaji - "The Nagaland State Finance Commission Bill, 2025" aser "The Nagaland Flood Plain Zoning Bill 2025" lir.

CM Rio-i finance portfolio bena lir aser pai ashiba agi Nagaland State Finance Commission Bill indang nükjidong ya local bodies atema State Finance Commission ka tentettsü atema lir.

State Finance Commission nung züngsemtem shimoktsü, parnok shimyim, tashi agütsütsü aser maparen inyaktsü atema iba bill benoker ta pai ashi.

Iba Bill ajanga senotsü amshiyim nung yariteptsü, local governance tashi itdaktsütsü aser local bodies o rural local bodies-i parnok teinyaktsü shitak inyaka otettsü ta CM Rio-isa ashi.

Commission-i ashiba nung ajemdaker rongsen kasa lemsatsü aser ibaji ajanga Nagaland nung local self government institutions senotsü nung timtem majurutsü aser nungdakba civic services agütsütettsü, ta paisa metetdaktsü.

Commission-i panchayats aser urban local bodies senotsü jenjang meyipa reprangshitsü aser state senpong nungi parnok den lemsateptsü atema tebilembatem abentsü ta CM Rio-isa ashi.

Tanü assembly nung benokba bill tanabubaji Flood Plan Zoning atema lir aser iba ya Nagaland state nung ayongtem nung tüzümsüng

ajuruba tesemtem zoning atema lir.

Flood Zoning Authority-i ayongtem nung tüzümsüng ajurudak bushiteptsü aser asameyanga nungdakba mapatem inyaktsü ta Rio-i ashi.

Flood Plan Zoning Bill indang nükjidong tongtibaji ali amshiba nung tenük yoktsü, tüzümsüng ajurudak terenlok mapa inyaktsü aser tüzümsüng agi teraksa bentsür aruba ajema kümdaktsütsü atema lir.

'Flood plain' nung water channel, flood channel aser temeket nung tzü atsüngdenba tesemtem dena lir ta CM Rio-isa metetdaktsü.

CM Rio-i bill ana benoka lemsatepba sülen NLA Speaker Sharingain Longkumer-i Brihostibarnü bill ana benoka jembitsü ta metetdaktsü.

Nagaland Assembly nung 'Satanic Worship' onük mejembi

Kohima, September 2, 2025 (TYO): Nagaland Assembly nung tanü 'Satanic Worship' onük benoka jembitsü sentong liasü saka mejembi thinenogo.

Mongulbar nungi anogo asemnü atema NLA monsoon session tenzükba agir.

Naga Peoples' Front Legislature Party leader aser taoba home minister MLA Kuzholuzo (Azo) Nieniu-i Rules of Procedure and Conduct of Business nung Rule 54 kübok "Prohibition of Satanic Worship in Nagaland" onük benoka jembitsü asüngdanga liasü.

State Assembly Secretariat-i Nieniu dang pai ashiba onükji "urgent public importance" ama züngokogo aser monsoon session tenzükba anogo nung benoktsü ta telangzüba agüja liasü.

Tanü session nung iba onük ya serial three nung liasü saka benoka mejembidang NLA Speaker Sharingain Longkumer-

i Rules of Procedures and Conduct of the House nung Rule 312 aser 313 nung aliba ama onük mejembi atar ta metetdaktsü.

Sorkari iba onük House nung jembitsü lemtetba atema süoki ia bilemer ta Nagaland Joint Christian Forum (NJCF)-i Hombarnü sangdong ka agüja liasü.

Assembly nung iba onük benoka jembiba ajanga iba inyakyim tali ajungkettsü mesüra shitak ama kümdaktsütsü akok ta NJCF-i ashi.

Mojing külemba ya alimai magizüker aser Naga loktiliba den khenyongi meputep ta parnokisa ashi.

Iba bilemtetsü ya ya süoki ia bilemtsüla aser ozüng tapet ka yanglutsü atema Assembly nung benoka jembitsüla ta tanü session agibia sülen MLA Azo-i osangbener dang ashi.

Paia Nagaland nung ibala inyakyim ajangshi asü koda ta

osangbeneri asüngdangdang "Nagaland nung mojing külemba kulitem lir" ta Azo-i langzü.

Parnoki nisung tepseter, auyar, tiyazü jembir, tashiyim agi shi nung medemer, asüngteta malir, drugs achir, meimchir tenla agütsür ta paisa ashi.

Hindu state 8 - Bihar, Chhattisgarh, Jharkhand, Maharashtra, Karnataka, Rajasthan, Odisha aser Assam nungbo state jenjang nung mojing külemba anema ozüngtem lateta lir. "Hindi state temi iba tebilemtsü atema süoki ia bilema aser ozüngtem yanglutetra kodaser asenok ama Khristan state kati meyanglutettsü?" ta Azo-isa metetdaktsü.

Iba onük ya Chief Minister Neiphiu Rio aser Speaker Sharingain Longkumer nati mepishiba ama agiena atar aser jungjunga shisadangba sülen House nung benoka jembitsü ta paisa ashi.

MOs atema Palliative Care nung state training ayongzüka lir



Dimapur, Rongjui/ September 02 (TYO): National Programme for Palliative Care (NPPC), Department of Health & Family Welfare ajanga Medical Officers asoshi State Training of Trainers in Palliative Care sentong Directorate Conference Hall, Kohima nung September 2-4, 2025 asoshi ayongzüka lir.

Dr. Chikrozho Kezo, Jt. Director & SPO NPPC ajanga iba sentong tenzüka jembidang, tongtipang nisungtem, mongintem aser shilem agirtem pela agizük aser district representatives ajunga dang ToT nung kanga junga shilem agitsü aser NPPC kübok palliative care services tashi itshitsü asoshi inyaksü ayongzüka liasü.

Dr. Mereninla Senlem, Principal Director, DH&FW ajanga iba sentong ayongzüka nükjiding lemsatepba mapang, teintet rogotem tali akumba aser menatepa maoba tashidak aser menatepa aoba tashidak kar indang tebilemtsü tali akumba ajanga palliative care

nüngdaker ta ashi.

Palliative care yagi shirangertem aser kinungertem indang takum jenjang tajungba kumdahtsür. Tang palliative care nüngdaka alir shilem 14 dang iba teyari ya agir.

NPPC ya Indian healthcare system nung palliative care lungjemdaka timba nem amshidaktsütsü asoshi lir. Palliative care nüngdakba shilem 80 dak tema training aser support systems shidak amshia kidang ketdang sütettsüba lir.

Cancer, end-stage organ failure, neurodegenerative diseases aser geriatric conditions alir shiranger aikati kidang ang anepaludaktsüner.

Mozüki nung amenoka aliba palliative care ya resource-intensive lir, saka kidang amenoka aliba palliative care ya jenjang tajemba aser menüngdakba nung mozü kidang memungi anepaluteter.

Dr. Keveduyi Theyo, SPO NHM ajanga National Program for Palliative Care (NPPC) ya 2012 nung tenzüka aser tangbo National Health Mission (NHM) nung shilem ka lir ta ashi.

Nagaland nung palliative care programme ya 2017 nung tenzüka aser iba sentong kübok ki o jen, capacity building, drug availability aser awareness agütsüba nung rangloker, ta ashi.

Kidang shiranger anepalitsü asoshi HWCs, PHCs, aser CHCs nung palliative care tashi itshitsü kanga tongtipang lir. Caregivers (kinunger, ASHAs, ANMs, community health workers aser trained volunteers) ya shiranger aser healthcare professionals tsünga primary link ka ama lir.

Iba sentong nung Dr. Obangjungla, IAPC Executive Member & Representative North East India ajanga jembia liasü.

Anogo asem asoshi training nung shisalen sayur ya Dr. Kikato Chishi, Oncology Department, NHAK Kohima; Dr. Nepuni Athikho, Consultant Family Medicine & Geriatric Health, Eden Hospital; Dr. Tony Vikas Bishwas, HoD & Consultant Palliative Medicine, CIHSR aser Ethungbemo Ezung, Drug Control Officer, Drug Control Administration, DHFW nungertem alitsü.

Nagaland Angh-i Mungmung salem lemsatep

Dimapur, Rongjui/ September 02 (TYO): Sangtam nunger adianu aser adianutsür aser Nagaland nung aliba nüburtem den tepela Mungmung benjong salem lemsateper, ta Nagaland Angh Ajay Kumar Bhalla-i ashi.

Iba benjongmung ya nendaka aser tenüngsang agüja amunger, anungji Sangtam kin indang sobaliba tajung aser nature den

tesendaktep aliba sayur.

Alu junga arutsü atema teyanglur nem temoatsü meshitsü, telungjem nung lemsateptsü aser tesunep aser yimchiyimjung asoshi sarasademtsü mapang lir. Iba Mungmung ajanga tepela, anema aliba aser temaotsü mulamushia bener arujang ta moatsür, ta Nagaland Angh ajangasa ashi.



Sept 2nd nü Nagaland Chief Minister, Dr. Neiphiu Rio (tiyong)-i nüburtem anema alitsü asoshi adokba kaket ka tenüng agi 'A guide to Better Health' lapoktsüba mapang, pa den Nagaland Legislative Assembly Speaker, Sharingain Longkumer (achichi) aser IDAN Chairman, Abu Metha na noksa nung angur. Iba kaket ya Medanta den yaritepa Investment & Development Authority of Nagaland, Department of Youth Resources & Sports aser Nagaland Legislative Assembly parnok külemi senteper adokba kaket ka lir. Iba kaket nung nübur anema alitsü atema teinyaktem, tashitak balala nungi jenbua alitsü tasatem, Nagaland nung medical service agütsüba Govt. & private mozükitem tongtepratepdak densema keta angutsü. Kohima, 2nd September, 2025

Dimapur nung 10buba SARAS fair lapokogo

Dimapur, Rongjui/ September 2 (TYO): 10buba Regional Sale of Articles of Rural Artisans Society (SARAS) Fair 2025, September 1 nü Super Market nung The Garden, Dimapur den atonga lapokogo. Iba fair ya Nagaland State Rural Livelihoods Mission (NSRLM)-i ayongzüka lir aser September 10 tashi lapoktsü. Fair mapang stall tem anepdang 9 nungi aonung 7 tashi lapoktsü.

Fair lapokba sentong nung mejeta jaoker ama Director of Rural Development, M. Mongna Konyak-i stall tem

lapokja liasü. Saras Aajeevika kübok tetsürtemi yanglutetba osettsü balala sayatsü nükjiding nung iba fair ayongzüko.

Ajak senteper Nagaland, Arunachal Pradesh, Sikkim, aser Manipur nungi Self Help Groups (SHGs) 43-i iba fair nung shilem agidar. Iba ajanga rural artisan aser entrepreneur tem nem parnok indang oset sayatsü aser ayoktsü atema maongka tajung agütsür.

Mission Director, officer tem aser NSRLM staff tem den nüburtemi iba sentong nung shilem agia liasü.

NPF CEC senden ayonger

Dimapur, Rongjui/ September 02 (TYO): NPF Constitution indang Article balala nung tashi agüja aliba amshia tir ajanga Naga People's Front (NPF) indang Central Executive Council (CEC) ajungben senden ka

September 6, 2025 anüngdang 11:00 ako nungi tenzüka NPF Central Office Khima nung ayongzüker, ta MLA & secretary general, NPF, Achumbemo Kikon-i sangdong ka nung metetdaksü.

Grassroots aser Central level nung Party tashi itshitsü asoshi pangzüng yanglutsü atema iba senden ya ayongzüker, anungji CEC zügsem ajak medema arua adentsü mepishir, ta sangdong ajangasa ashi.

Directorate of Health & Family Welfare nung Creche sayaogo



Dimapur, Rongjui/ September 02 (TYO): Directorate of Health & Family Welfare nung taoba mapang NHP ta aliba Creche (Child Play Room) ka semzüko, kong Dr. Akuo Sorhie, Retired Mission Director NHM aser

Dr. Vezokholu, Retired Director, DHFW sentong akhumdong ama dena liasü.

Principal Director, Dr. Mereninla Senlem-i iba sentong nung jembidang, iba Creche (Child Play Room) semzüksü asoshi mapang talangka nungi

sentong yanglua aru aser staff tem ajangzüksü asoshi semzükteter, ta ashi.

Sentong nung Dr. Avile Zao, Mission Director, NHM menden liasü aser Dr. Vezokholu Theyo Retired Director, DHFW ajanga sarasadem.

Osangbener dak akhaba Ao Milen-i aitsür

Dimapur, Rongjui/ September 02 (TYO): Manipur nung Senapati district kübok Laii yimtsüng nung August 30, 2025 nü Zinnia Flower Festival alidang Hornbill TV indang osangbener dak akhaba ajanga kanga aoksar aser jashir. Tepela anogo ka asütsüba sernung nüchi shisatsü maka azüdokshi agi nembangtsü, ta Ao Milen sangdong ka ajanga ashi.

Iba ama tazü mapa inyakba Ao Milen-i khukhua aitsür. Timtem jenti ajuruaka osangbener demi ochi wazüka ayutsü merangba mapang ka nung parnoki meranga inyakba mapa amokmeren aser azüdokshi agi menentsütsü merangba yagi temulung nung anisüngzüng monguteter.

Iba ama inyakyim yagi

democracy tamendak dak anokshitsür.

Press freedom aser democratic values wakzüka ayutsü asoshi onoki sorkar aser ozüng amshirtem dang tekeraba nung ochi obendang shidak agütsütsü ayongzüker. Iba tatalokba nung ozüng amshirtemi tamakok ajuruba ajanga lokti nung tetsübo ang adokdaksütsü, ta ashi.

Külem tenzüker Dip Saikia den Ao Milen nokdaka lir aser pa tekeraba nung taneptsü angutsü asoshi sarasademtsür.

Democratic lokti ka nung azüdokshi asoshi tesem maka aser ochi angatetba nübur, lokti tentet aser civil societies ajunga dang külemi iba ama mapa tamajung anema ola adoktsü atongzüker, ta Ao Milen sangdong ajangasa ashi.



TIR YIMYIM YIMOBILEM (EDITORIAL)

DIMAPUR WEDNESDAY, SEPTEMBER (RONGJUI) 03, 2025

Govt school-tem tajungba akümtsü

Nagaland nung küm 50 shi jakdangbo, tanü amai private school mali, government-i lapokba school-tem dang liasü, aser item school-tem ajak nungji tazünger sünga dang liasü aser yamaji tesayurtemia bendanga agüja sayu. Aji oda, tesayurtem aikati küm piyong nung sodi kenü danga magii tesayur mapa inyakba otsü lir. Item tesayurtemi sayutetba purtem jagi yimten, arogo aser lokti nunga temulung agüja tenzük aser ochishia inyak. Parnok temoatsü nung tanü parnok chirnur aser semchir semnurtem aika maparen balala nung maongka tajung ngua jangratema inyakba angur. Ajisüaka, tanü tendak kija taküm nung süshia mesüra government nung süshia asenoki asen tsüraburtem senmang mamangtetba kaji, asen lima nung private school lapoka aoba metetmeteta government school mejungi akümba ya ka asütsü. Aji oda, asen lima nung private school lapokba yagi takar o sensaker na bendanger amaika kumadok, ibayongji private school nung fee agüja azüngertemji takar chirnurtem aser government school nung angati azüngertemji sensaker rogotem ta bilema züngshi. Iba denji ano private school tenüng ajak nung 'English School' ta enok, iba jagi private school nungang English oshi junga angazüktsü amai bilemdaktsü aser asenok tejangraba tulutibaji English oshi ashitsüba liasü, kechiyong English oshi ya taküm nung takok angutsüba aser tulur akümtsüba oshi liasü. Iba tangatetba nung government nung tesayur chirnurtem dena private school nung züngdaktsü. Ibaji, ashiko, Nagaland nung government school-tem majung akümtsüba tenzükba mapang liasü südi. Ano kasa mapang nung, Nagaland nung government school-tem alu tenzükbaji 'party politics' ajanga liasü, kechiyong election mapang masemertembo government nung alir yimsüsürtemi 'political transfer' talanglangisa yok, iba jagi tesayurtem tezüdangdaktsü aser tesayur mapa mera maket aküm. Iba amaji külen private school teimba teimba lapoka aoer aser külen tesayurtem transfer oteper ta süa süa Nagaland nung government school ya kaketshisatsü sayudak masü saka 'politically' tesayurtem nem temerenshi agütsüdak aser mapa meinyaki ita sen achidak kuma adok. Atangji, iba amaji mapang tamajung ajuruaka, tesayurtem aikati tanüa meranga sayur aser school-tema karbo private school-tem dang nungia tajungba kuma anepalutetba school lir. Ajisüaka, lia lia government school aika nung tazünger mali kumadok, anungji tesayurtemi sayunüaka kaketshir kata maliba school-tem teimba teimba kumadok. Iba denji ano asen lima nung tanur masoba timtem agi kaketshir nütsünga ajema adok. Ano asenok tia majung kaji, asenok dak ochi maliba agi asenoki asen alidak government school nung tazünger mali ser nung lir amai sayutsü atema taila kaketshirtem tenüng aika züludener sayu. Iba jagi tesayurtem karbo school-i kenüa mao ser ita sen agia arur südi. Ano, iba ama government school nung tazünger maliba mapang, government nung alirtemi sentong tajung yanglua school tajungba kumdaktsü masü saka tazünger mali ser yimtsüng ajak nung Government high school lapoka yutsü aser ano high school ajangtetertem azüngtsü atemabo government higher secondary school –bo melapoktsü. Government nung School Education ketdangsertemi pei teni alema kecha mangdang manguba aser mebilemdangba mapaji aji ka liasü. Iba ama shisamaka, matumalem sentong agi government senbo aika endok, kechiyong tazünger maliyonga government high school ajak nungji tesayurbo alitsüsa aküm aser ano high school kar nungi class 10 ajangtetertemji tazüngdak government higher secondary school maka nungji, private school nung fee agüja mezüngteter kibongtem nungibo, tapayutsüka, tanur taküm aika raksadaktsüogo. Item meshitakba sentong aser takoksatemji reprangteta taküm küm nungi Nagaland nung tazünger maliba aser tesayur ka dang aliba government school-tem ajak shibangtsüba ya tetenzük ser Nagaland nung government school tajungba kuma shia arudaktsütsü imlar. Ibaji mapabo tuluka aser saka tasakbo masü.

OLEMSABANG

OCHISHIA MERANGA INYAKA ALIBASA AJAK DANG TAJUNGTIBA

~ L. Kika Pongener.

(Yashi adok nungi...)

Tanü putu nung, tiyazü jembia, tangar ashiokja, mashilen nungi aazüka bener aruba rongsen agi takar kuma alir-a aika lir. Tatishitsü agi... Election aruba shia Candidate-tem dang.... Kü den nisung aika lir ta tiyazü jembia tiyazü list tapak talanglang zülua sayur sen merijang/lakh/crore menden tashi meshir takar akümba karbo lir. Ano karbo ashi auyaa, mesura rakzükrakdema takar akümba-a alitsü akok. Ano karbo sorkar-i linuk terenlok atema agütsüba rongsen pei agitsü alozüka bendena takar akümba-a alitsü akok. Ajisuaka, kanga junga shisadangra, tiyazü jembia, tangar ashioktsür, auyaa, rakzükrakdema bener aruba rongsen jagi anogo, ita, küm kwika chiyunga-jema litettsü...??? Ashiko, iba rongsenji kechi komala lenmang nung endoktsü'ar shibai metet.... Ashiko, kitsük-kirong lendong ka nungang mi agi rongreptsütsü asü (?) Ajongben lendong kar ataloka mesura mena-meyang kar nungang endoktsü asü (?) Maneptetba tashitak kar keter Hospital nungang endokmatsü asü (?) Mesura jala-jabaso mozü-mora achir kar inteter chireptsütsü asü....??? Tsüngrem o-i ashir... "Tiyazü temeli agi anguba rongsenji meyipzüa alungba tangola, shirnoki itemji bushir parnoki tasüba bushir" (A.Shin-21:6). "Tamajung agi ajangzükba rongsenji kecha tajangzük mali" (A.Shin-10:2). Atangji, tim masüba lenmang nungi bener aruba aser ochimashi agi ajangzükba rongsenji kecha temong maka amajok kar nungang endokmatsüa shibai metet....???

Ano azümesena mapa meinyaknu, kazüa dang aliba nisungji, kodanga kaa-ita anisungzüka malitsü. Ajisuaka, shirnok azümesen mesui mapa meranga inyaker, parnokjibo kodanga anung-akonga, timtema, sensaka malitsü. Aji oda, pei sasa meranga inyaker, aazüka bener aruba rongsen-jibo tera dang asüyongjia nang-nanga achitsü. Tsüngrem o-i ashir... "Azümesen takümi sashia aginur aser kecha makar; Saka tenendakba takümü yiraa kumdaktsütsü" (A.Shin-13:4). "Züsenba ajak nung tajangzük lir; Saka tebangi jembiba agi dangbo anung-akong dang tendaktsür" (A.Shin-14:23). Azümesener jagi aika aginur, saka pai/lai meinyak nungji kecha makar, saka tenendak/meranga inyakba agibo yiraa akümtsü/takar akümtsü. Asen Naga nunger ya mapabo kecha meinyaknur saka chiyungtsübo shi-ango dang chinuba kin ka lir. Azümesen aser chidiyungdi takümü kodanga takar makümtsü. Anungji asenoki mapa meranga inyaka ochishia takar kuma alitsü merangdi.

Ano tangar dang teka laadaker, aputaka külema, azü kuma, meshimetsüa alidang nungibo, pei sasa meranga inyaka asen sasep peria, tanü poksung alibasa ajak tang tajungtiba. Tangar dak metaloker, tangar dang aputaka külema, tangar dang meshia kibong mesua alitsübaji kecha jangrademtsü mali. Kechi-koma'ar ka mejungketa akayongjia, tangar dang meshimetsüa takar akümbaji kecha mera maket. Pei sasa meranga inyaker, asen kechi aka aji agi tenuk sunger, talila merumero mesui, asen sasep peria chiyunga-jema alibajisa ajak dang tajungtiba. Tangar dang apoa/meshia shi-ango den chiyungdang nungibo, pei sasa meranga inyaker, nupangso, etsük-ontsü, ngashi lon, azüng-kenshi lon den chiyungba tanangba. Shirnoki tangar dang teka laadaker, lala-shiponga, meshimetsüa alir, parnok jagi kodanga tangar dang tim o meshitettsü, tangar nukrang metizüktsü aser tangar tejak maremtsü. Ajisuaka, shirnok pei sasa meranga inyaker pei tepok sunga lidir, parnok jagi shinga daka metsükdaki tanak dang tanak; temesung dang temesung ta shitettsü. Atangji, ochimashi rongsen agi takar aküm dang nungipo ochishia meranga inyaka pei tepok sunga alibasa ajak dang tajungtiba lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Maharashtra sorkari arogo li agitsü aliba court-i memela

Mumbai, Rongjui/September 02 (Agencies): Slum nung alirtem anidena lidaktsütsü asoshi sorkari Bombay Archdiocese meyong ali agitsü aliba India nung tematiba court-i thitsü aser ibai ochi aser ozüng tangatetba anema lir ta ashi.

"Supreme Court totuyuba ajanga asen li tanaben yanglushitsü asoshi Arogo indang jenjang aser temeden jangjatsür," ta Archdiocese of Bombay indang odongtar Father Nigel Barretto-i ashi.

Iba ken o ya Mumbai tiyong nung upmarket Bandra area nung Basilica of Our Lady of the Mount Trust meyong ali tasazük 1,596-square-meter indang lir.

Küm aika iba ali ya azüki mesüra informal settlements agi sünger liasü. 1978 küm Maharashtra indang sorkari iba ali ya 'slum' ta sangdonga liasü.

2019 küm yangji alirtemi private developer ka teyari nung informal settlement raksatsür multistory apartments yanglutsü merang.

Arogo ketdangsür temi iba sentong anema nokdak aser iba kimong ya par meyong ali tuluba (10,000-square-meter) nung

shilem ka lir ta nokdak.

May 2021 nung arogoi Maharashtra sorkar indang Slum Rehabilitation Authority (SRA) nem par 'redevelopment proposal' agütsü. Ajisüaka SRA-i aji magizük aser parnok menuogo aser "prescribed format" nung masü ta ashi. Iba den külemi SRA-i iba ali ya agitsü asoshi mera agi tenzük.

Iba arogo yagi Bombay High Court dangi ken o aben aser June 2024 nung SRA inyakyim anendaktsü aser arogo indang temeden kanga nema repranger ta ashi.

Yangji alirtem, private developer aser SRA ajanga state indang court totuyuba anema Supreme Court dangi aben.

Yangji alirtem arogo-i mapang talangka iba ken o senzüka yutsü aser sentong tejangja keraa magütsü ta ashi. SRA-i parnok bhukuma nokdak.

August 22 nü Supreme Court totuyuba nung, "Slum rehabilitation area kibur (arogo) ajanga iba tesem yanglushitsü temeden lir, aser iba temeden amshitsü maongka shidak magütsü State mesüra Slum Rehabilitation Authority ajanga iba ali agitsü

memerangtsüla," ta ashi.

SRA aser private party temi tebilemba tamajung nung inyak aser ozüng agi mela aliba arogo temeden malemstsüla, ta India nung tematiba court ajangasa ashi.

Arogo indang redevelopment proposal SRA ajanga magizükba ya tim masü aser ochi aser ozüng tangatetba alema lir ta court-i obendang agütsü, ta arogo indang legal counsel Viren Misquita-i ashi.

Iba totuyuba ya ajanga slum redevelopment projects tashiyim agi agitsü merangba anema tatishitsü tongtipang sayur, ta Misquita-isa ashi.

SRA yagi arogo ajanga par li redevelop asütsü merangba anema nokdakba nung ranglokba sayur, ta Supreme Court ajangasa ashi.

Tematiba court-i arogo dang slum redevelopment atema scheme ya anogo 120 tsüngta agütsütsü totuyuba agütsü aser SRA dang iba ali surveys aser demarcation nung akokba agi yariteptsü ashi.

Arogoi proposal agütsür anogo 30 tsüngta SRA aser state sorkari maparen inyaktsüla, ta Supreme Court ajangasa totuyuba agütsü.

Mallorca Party Zone nung nisung aikati Khrista agizük

Mallorca, Rongjui/September 02 (Agencies): Spain nung aliba Mallorca asetkong ya aiben 'international party destination' ka ama züngshir. Taküm yangji meyi mapang hopta ana Khristanpur noklang aika adenshia sarasadem, tzükum nung tekülem sentong agia aser tzüyim nung baptia Yisu indang temeim lemsatapa liasü.

Item lanurtem ya aika Germany, Switzerland aser Spain nungi liasü aser parnoki yangji aliba arogo balala den lungjemer Mallorca indang nightlife zones nung osang tajung prokshia liasü.

Iba asetkong tenüng tamajung liaka, evangelism asoshi süngjang timtiba atangba tesem ka lir, ta Gospel Tribe nungi Gernot Elsner-i ashi.

"Nisungtem yi ajemba aser benjong aliba nungi anizüngzüka temai aludang, onoki lisem nung sapang tilaka yanglua aliba ngua parnok mezüngbo süngmang, kechiaser yangji nisung kari Yisu indang jembitsü imlaa meliasü," ta Elsner-i iba tatalokba indang rasaa ashi.

Parnok aonungshia aru aser takum kuli tem aser sayutsüngi o anga. Nisung kari Yisu nem takum bendanga agütsü aser kar tzüyim nung bapti.

Ministry ajanga evangelism mapa inyaktsü atema party rong ka amshi.

"Yimya agi item rong ya party tourism atema amshir, kong nüburtem yi agi mesepa ajemer aser ken angaa kazür. Onoki iba rong tesadang ka Khristanpur aser tesadang ka mamanger agi sünga

mendaktsü... Onoki osang tajung indang tera lemsatep aser rong nung aliba Khristanpuri kechi inyaktsüar meteter liasü."

Sentong takok ngua inyaktet aser aonungshi baptiba mapang tanüla aika Yisu dangi anir aru.

"Aonungshia onoki tzükum nung sentong agidang nisung arujen aru aser parnoki par takum otsü lemsatep aser tatok meshi. Aser renema aliba aser talisa yi majem aliba nisungtem jangjateta baptitsü maongka agütsü," ta pai ashi.

Party tourists nung taoba mapang Khristan ka ama alirtem liasü, aser parnoki parnok yangji mekazütsü ta meteta liasü. Aser parnok den Tsüngrem o lemsatepdang parnoki meteta akum aser yangjisa Yisu dangi meyip, ta Elsner-i ashi.

ANOGO ABEN TSÜNGREM DEN

Tepela Aluruba

T. Ken 126: 1-6.

Iba ken ya 2 chubatem 19 aser Isaia 37 nung Tsüngremi kechi inyak iba nungi agiteta zülu, kodang Hezekia, Yihuda nung chuba alidang Sennacharib aser Assyria armyi Yirusalem lungpang, Yihuda nunger chiyongtsü asoshi kümzüktsü nüngdaka liasü, kechiaser tsükchirtemi lemanng ajak nokdanger Yihuda nunger chiyongtsü mengui liasü. Parnok alu rui aotsü mokoki liasü. Tsük senti liasü. Nüburtem kümzüker külen kodang parnok alui ao, parnoki telemtetba ka agi. Parnoki tsükji pei tanurtem atema amshitsü asü, mesüra proktsü? Aluyimertemi ajep kechiaser parnok tsük ali nung proktsü aküm(t.6). asenok ajak metsü proker aser tarurtem lir.

Tepela aluruba akatsü asoshi asenoki kechi inyaktsüla? Mezüngbuba, osangtajung metsüji prokang. Laishiba nung kuli asüba noksa aika lir (2 Kor.5:20, Zek.3:2; Matt. 4:19; 5:14). Osangtajung agi nüburtem atongbaji alu ayimba mesüka lir. Iba nung amalitep nungdaker, Kechiaser kari proker aser kari arur. Na aluruba nung shilem ka asü ?

Aluruba asoshi nai sarasademang. Kümzüka malir asoshi na tanü ajebtsü akok, saka kenü na pelatsü (Gal.6:9). Shirnoki osangtajung proker parnok tepela alururtem asütsü. Tanabuba, ne rongsen Tsüngrem sentsüwangshi asoshi prokang. Asenoki prokba asenoki arutsü(2Kor 9:6-11). Nisung aikati tamagitsü nung pei rongsen lalur. Missionarytemi teyari atar, arogo ulushitsü arogoi teyari atar. Asenoki mokuri prokra asenok tepela alururtem asütsü ta Pauli ashi.

Tesembuba, Tsüngrem Tanela Temeshi prokang (Gal 6:6-8; 5:16-23). Asenoki ya koda inyaktsü? Asenoki Tanela mapatemji asen mulungjang nung ayutsüla. Kodang asenoki Tsüngrem o nung shisadangdir (T.ken 119:11), asenoki Tanela aluruba arutsü. Temulungjangji atsüki ka mesüka lir, anungji asenoki aji reprangtsüla. Aji temulung meyipba. Temeshi alitsü mapang agiang, sarasademang, o nung shisadangang aser metsüji ne mulung nung remang.

Tanü nai inyakba ajakji aremer; metsü tajung arutsü jangjaang.

Rajasthan cabinet-i anti-conversion law agizükogo

Jaipur, Rongjui/September 02 (Agencies): Rajasthan cabinet ajanga August 31 nü state indang anti-conversion law tesashiba agizükogo, kong takum tepiyong tepuokdak ayutsü dena lir, koba ita trok tejakdang legislation agizükba kanga tesashiba akumba alitsü.

September 2 nungi monsoon assembly session tenzüktsü lia Chief Minister Bhajan Lal Sharma indang sorkari iba amended bill ya agizüka liasü. Iba yagi Rajasthan Prohibition of Unlawful Conversion of Religion Act, 2025 tashi kanga itshidaktsür, koba Health

Minister Gajendra Singh Khimsar-i February ita assembly nung benoka liasü.

February ita ozüng nungya temelaba makai tamangba yimsü melenba asoshi tepuokdak küm ka nungi pongu tashi ayutsü aser senchi sen 15,000 achitsü shia lir. Tang yanglushiba nungya tanur, tetsür mesüra Scheduled Caste aser Scheduled Tribe züngsemtem tamangba yimsü melendaktsüba asoshi tepuokdak küm ana nungi ter tashi ayutsü aser senchi sen 25,000 achitsü shia lir. Nisung telok yimsü melendaktsüba

asoshi tepuokdak küm asem nungi ter tashi ayutsü aser senchi sen 50,000 tashi achitsü.

Tang tesüsa cabinet ajanga agizükba nungya temerenshi tesashiba lir. Aiben aibelener aser nisung aika yimsü melendaktsür tem tepuokdak takum piyong ayutsü aser senchi sen 50 lakh tashi meshitsü, ta Law Minister Jogaram Bairwa-i osangbener senden ka nung ashi, kong Deputy Chief Minister Premchand Bairwa dena liasü.

"Basic illegal conversion" asoshi tepuokdak küm 7 nungi 14 tashi ayutsü aser senchi

tajemba agi sen 5 lakh achitsü tang tasenba ozüng nung shia lir.

Iba amendments nungya February ozüng nung maliba categories tasen inoka lir. Tamangba yimsü melendaktsütsü asoshi bendanglen mesüra ozüng alema aruba sen amshiba atema tepuodak küm ter nungi 20 tashi ayutsü aser senchi sen 25 achitsü, ta Patel-i sangdong.

Iba ozüng nungya voluntary conversions atema district magistrates nem anogo 60 jelia osang agütsütsü shia lir. Tamangba yimsü melener sangdongba ya magistrate

office notice boards nung nübur dang sayua ayutsü shia lir.

Ozüng anaben yanglushiba nungya tamangba yimsü melenba teratet nung 'Ghar Wapsi' indang mali. February bill nung tesüba tamangba yimsü dangi tanaben meyipba ya tamangba yimsü melenba ta züngshitsü metemsü ta shia lir.

Ozüng tesashiba ya tan assembly session nung agizüktsü amai lir. Iba ama ozüng yagi Article 25 nung tamangba yimsü temeden agüja aliba nung aibelener, ta opposition party tem aser CSOs temi ashir.

AO OSHI ANGAZÜKDAK:**TANÜ ANGAZÜKTSÜBA OJANG****Tetezütsü**

(n) ataloktsüba indang anguba mesüra sayuba (omen)

* Anüngdang anü meketa tongnügen adokbaji tetezütsü lir.


Tethama

(adj) ajungben osang agi aoksaa bilemba (astonish, surprise)

* Ozü medemer asüba osang angashir tethama agi kecha meblemtem.



Tir Yimym

OLONG PAITEP # 7259**TIPIEN**

2. Sü jeplok
4. O agi merenshi
7. Ayongküm li
8. Chiyungtsümapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

LANGTSÜNGLEN

1. _____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. _____ kibur
13. Tebur tembar tsüngda jatepba

OLONG PAITEP # 7258 TELANGZÜBA**TIPIEN :**

1. Semtu, 3. Lepko, 5. Bilem, 8. Ulu,
10. Tsüngpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER

دبي مولاثون

DUBAI MALLATHON

Dubai Mallathon ajanga Guinness World Record ka yanglutetogo aser ibaji mall run event nung nisung teimtibai shilem agiba lir. Iba Mallathon ya August ita tetenzüklen shopping centres 9 nung agia aru aser ita ka piyong nung nisung 40,000 temai shilem agia liasü. Yimti ajungalen agiba sentong nung malls tem indoor fitness tracks ama aküm.

Manipur nung kaketshirtem shirangba atema school shibang**Imphal, September 2, 2025**

(Agencies): Manipur kübok Tegnoupal district nung kaketshir 70 tema hopta ka tsüngda temang manemi akümba ajanga health teblemetsü tulu ka ajurua lir.

Kaketshirtem ya Sita Government High School nungi lir aser parnok shirangba ajanga school ketdangsürtemi reju shibangogo aser Teachers' Day sentong thinenogo.

Kaketshirtem ya typhoid, yimra mesüra merla ajanga menatepba tashidak agi timtemer asütsü akok ta temulung meleli bilemer. Iba ajanga tsüraburtem kanga shisabuluteper aser talisa health

infrastructure tajung maliba atema khuret abener.

Temang manemi akümba kaketshirtem mezüngbo Primary Health Centre (PHC)-i anir ao. PHC ya school nungi kilometer 18 pilar Tegnoupal District Headquarters nung ang lir. Ajisüaka PHC nung yipden peria maliba ajanga kaketshir aika pei pei kidang dang temang anepalutsüsa aküm.

Iba tensa atema Kuki Students' Organisation (KSO)-i School Management and Development Committee (SMDC) den yaritepa September 2, 2025 nü Chief Medical Officer (CMO) dangi temepishiba shidi ka züluogo.

Parnoki CMO dang medical team ka yoktsü aser free medical camp ka den school temeket nung malaria fogging drive ka alitsü mepishiogo.

"Kaketshir 70 tema shiranger aser parnok nem nüngdakba medical teyari agütsütsüla. Merla ajanga menatepba tashidak ya menatepa moudaktsüi noktangtsüla" ta KSO District Education Secretary Mimin Mate-i ashi.

Iba school nung Teachers' Day sentong magitetsüsa akümba ajanga tensaji kanga mejungi akümba sayur. Lokti lennirtem aser tsüraburtemi medical teyari shitak agütsütsü metetdaksüogo.


PM Modi-i Sep 13 nü Mizoram aser Manipur semdangtsü akok**Aizawl, September 2, 2025**

(Agencies): Prime Minister Narendra Modi-i September 13, 2025 nü Mizoram aser Manipur semdangtsü akok ta ketdangsürtemi ashi.

Prime Minister Modi-i Mizoram nung Bairabi-Sairang railway line tasen lapoktsütsü sentong lir.

Modi-i Aizawl nungi Manipur semdangi aotsü akok ta Mizoram state ketdangsür aikati ashir. May 2023 nungi Manipur nung kin o kin tsüngda rara adokba sülen PM Modi-i tang mezüng atema Manipur semdangtsü.

Ajisüaka, tang tashi nung PM Modi indang final itinerary

**Narendra Modi**

ano mesaya lir. Imphal nung ketdangsürtemibo pain Manipur semdangtsüba osang tejangja meshitet.

Mizoram Chief Secretary Khilli Ram Meena-i Hombarnü department balala aser özüng amertem den PM Modi semdangtsü aliba atema

senden ka menogo.

Iba senden nung security arrangements, traffic management, reception aser street decoration indang jembi. Senden nungsa Lammaul, Aizawl nung sentong agidang sorkar mapa inyaktertem, aluyimertem aser kaketshirtemi adentsüba indang jembitep.

Centre sorkar Act East Policy nung kilometer 51.38 talang Bairabi-Sairang railway line ya shilem ka lir. Iba ajanga Northeast ajungalen sendakteptsü aser rongsenketzüng maparen inyaktsü nükjidong lir.

Iba railway line ajanga Aizawl-i Silchar, Assam ajanga linük den sendakteptsü.

Kinü tanur asüba atema GMCH staff 5 mapa nungi anentsü**Guwahati, September 2, 2025**

(Agencies): Gauhati Medical College and Hospital (GMCH) nung August 18 nü anogo 4 kinü tanur ka asüba atema Assam sorkari staff aika merenshiogo.

Iba lendong ya Neonatal Intensive Care Unit (NICU) nung atalok aser state sorkari senior doctor tem- Dr. Anupama Deka o Dr. Dipankar Hazarika, Dr. Puja, Nurse-in-Charge Gomti Devi, ICU technician Ishanjyoti Talukdar, aser staff nurse

Chandana Nath nunger ita trok atema mapa nungi anentsüogo.

Parnoki iba tatalokba bushisüngdangba telok anisaba putet aser records tejangja mayu.

Maneni, Srimanta Sankaradeva University of Health Sciences (SSUHS)-ia Department of Paediatrics nung postgraduate traineesna- Dr. Hrishikesh Thakuria (2nd Year) aser Dr. Pooja (1st Year) na ita trok atema sodi agütsüogo.

Anogo pezü tain kinü tanur

ya infection aser jaundice atema mozü kidang aniok saka pa medical equipment wires nung alenseter liasü.

Assam Chief Minister Himanta Biswa Sarma-i iba tatalokba sülen mozü ki semdang aser aibelenertem

"Kü tenük agi mapa shitak meinyakba nguogo. Kinü tanur ka süogo. Nurse tem ya tetsütem lir aser tanur ka samabaji parnoki kü dang nungi tajungba angateta lir" ta CM Sarma-i ashi.



Imphal : Sept. 02, 2025 nü State sorkari southern Kakching District headquarters nung awareness & interaction sentong ka agidang transgender nisungtem nem transgender identity cards aser certificate agütsüba noksa nung angur.

Afghan menoknok lendong nung asür 1,400 dak tema jungogo

Kabul, Rongjui/September 2 (Agencies): Mongolbarnü tashi nung Afghanistan menoknok lendong nung asür 1,400 dak tema jungogo, aser lendong nung yirurtem meyirejang aika kümogo, ta teyari agütsüba telok kati ashi. Linük anütoklen kinük nung aliba tenem lima nung teküzmükba maparen inyaksü asoshi tetsükdaksü ajangshia arudar.

Menoknok lendong nung nisung 1,411 asü, nisung 3,251 yiruogo aser ki 8,000 dak tema raksaogo, ta Afghan Red Crescent Society-i ashi. Iba telok ya iba tesem nung inyakba humanitarian telok ka lir, aser parnoki ashiba agi, nisung aika ano sabanga alitsü akok ta tsüba bilemer.

Afghanistan nung U.N. coordinator-i ashiba agi, lendong nung asür timba akümtsü akok.

Afghanistan ya menoknok tesashi agi aiben kongshir aser talisa Hindu Kush tenem len menoknok aiben anoker, kong Indian aser Eurasian tectonic plates ajuruteper.

Magnitude 6 tesashi menoknok ka Hombar ayaterem nung anak aser anütoklen Kunar o Nangarhar province na tamajungtiba kongshia liasü.

Hombarnü Kunar kübok menoknok agi kanga mejungi kongshir aliba yimtsüng pezü nung teküzmükba maparen inyakogo aser tang kinük nung aliba tesemtem tonga aotsü atema rangloker inyakdar, ta iba province indang disaster management tekolakba Ehsanullah Ehsan-i ashi.

"Kiojen raksar aliba nung nisung kwi sabanga alitsü aji onoki meshitettsü," ta Ehsan-i ashi. "Onok mapaji iba inyakyim ya takokba tashi takaratiba nung tembanga inyaksü aser lendong agi kongshir aliba kibongtem nem teyari lemstsütsü atema lir."

Pakistan den arrtsü nung longren longpang aser tsüngsang majungba ajanga kinük nung aliba tesemtem tonga ao teküzmükba maparen inyaksü tetsükdaksü adoker, kong ali aser longru agi yangluba kitem aika menoknok agi ajareptsüogo.

Tenem nung gari lenmang ilaraba ajanga tetsükdaksü tulutiba adoker, ta Ehsan-i ashiba den, lenmang merektettsü atema machinery tem bener arudar.

Mongolbarnü Kunar yimtsüangi ambulances tem lenmang raksar aliba ajanga aotsü meranga liasü. Maneni helicopter temi teyari balala bener arutsüba den yirur alirtem mozükidangi anir oa liasü.

Yirur alirtem ya kar Kabul nung mozükitemi aser kidang province Nangarhar-i anirogo, ta Ehsan-i shisem.

Kasa mapang nung tanurtem meyirejang aika lendongbang nung lir, ta United Nations Children's Fund-i Mongolbarnü metetdaksü.

UNICEF-i ashiba agi,

parnoki mozü, süoshi talem, süki aser tarpaulin tem aser soap, detergent, towel, sanitary pad, aser tzü bucket amala hygiene osettem yokdar.

Taliban sepaitem iba tesemi yokogo aser parnoki security nem teyari agütsüdar. Iba lendong atalokba ajanga rara agi kanga mejungi raksatsür aliba linük ya jenjang tamajungba kümdaksüogo. Taliban yimsüsüba kübok bendangertemi teyari agüja aliba kanga ajema akümba den kidanger linüktem nungi Afghan nung meyirejang aika meyipa yokba mapang tang ano iba lendong ya atalokogo.

Teküzmükertem aser ketdangsürtemi shiruru tasütem takaratiba nung intoktsü merangdar, ajita asünungdang iba ajanga tzü menentsü ana nung aliba nungi jenboa litettsü, ta U.N ketdangsür kati Hombarnü ashi. "Lenmang raksar aliba, aftershock tem aruba aser yimtsüngtem aika kinük nung aliba ajanga teyari magütsüteri lir," ta World Health Organization-i ashiba den, iba menoknok yagi nisung 12,000 tema dak kongshiogo.

"Menoknok anakba sülen health system dak sendakba nung local tashi ajema kümogo aser tangalen nungi teyaritem dak dang metaloker lir," ta WHO-isa shisem.

Tang chiyongtsü aser süki

kanga nüngdaka lir, ta a humanitarian tech platform Aseel nungi Safiullah Noorzai-i ashi. Kitem raksaba sülen nisungtem aika aftershock arutsü tsübuba ajanga kima nung dang litepdar, ta Noorzai-i ashi.

Rara agi raksatsür aliba linük nungya resource balala agi anüngba ajanga teküzmükba aser teyari agütsüba maparen inyaksü atema kanga tetsükdaksü adoker.

Tang tashi nung Britain-i, U.N. aser International Red Cross na nem healthcare aser emergency supply tem agütsütsü atema pound million 1 agütsüogo.

India-i süki 1,000 agütsüba den Kunar-i chiyongtsü ton 15 yokogo aser Mongolbarnü ano tanga oset balala yokogo.

China, United Arab Emirates, European Union, Pakistan aser Iran nungeria teyari agütsütsü nangzükogo.

U.S. tir Donald Trump-i January ita parnok indang humanitarian arm USAID nem senotsü agüja aliba ajemtsütsü telemtetba agiba aser foreign aid programme tem tajemba akümba ajanga Afghanistan dak kanga mejungi kongshiogo.

Kasa mapang nung Taliban-i tetsürtem anema inyaksangshiba ajanga kija, lokti tentet aser linük balalai parnok nem teyari agüja aliba anenogo.



OFFICE OF THE
CHANGTONGYA STUDENTS' UNION

TENÜNGSANG AGÜTSÜR



Changtongya Kaketshir Telungjem ajanga Wb. Imilepzük aser Wt. Tinutula na jabaso **Sb. Temjentoshi**-i NSF Secretary, Publicity and Information (2025-2027) jenjang ngutetba asoshi tenüngsang agütsür.

Tsüngremi ne taküm aser na inyakba wadang nung maneni moajangma.

Sd/-
Sb. Arensashi
President, CKT

Sd/-
Kr. Sashilemla
General Secretary, CKT

CHRISTIAN STANDARD HR. SEC SCHOOL

CHANGTONGYA -798613

ADVERTISEMENT

Subject : AO Teacher for Hr. Sec Section

Qualification : Graduate and above with B.ed in secular & M.A (Language)

Session : From May 2026

Interested candidate can submit your resume to the office or e-mail to cshss2017@gmail.com on or before 15th September 2025.

Sd/-
Principal
8974965991

Belgium-i Palestinian statehood agizüktsü

Brussels, Rongjui/September 2 (Agencies): Belgium-i iba ita tatemlen United Nations General Assembly (UNGA) nung Palestine indang state agizüktsü, ta Belgian Foreign Minister Maxime Prevot-i ashi.

"UN session nung Belgium-i Palestine agizüktsü aser Israel sorkar nem tenokdangba agütsütsü," ta Prevot shiba deputy prime minister lir, pai Mongolbarnü X nung zülutsü.

Belgium-i Israel nem tenokdangba 12 agütsütsü, ta Prevot-i ashi, kong West Bank nung Israel-i ozüng alema atsünger aliba tesemtem nungi oset balala import asüba nokdangtsüba aser Israel nung company tem den public procurement policy tem lepareprangshitsüba densema lir.

Prevot shiba centrist Les Engages party, mesüra The Engaged züngsem ka lir pai ashiba agi, Palestine aser talisa GAza nung mimchir temeden anema inyaksangshiba mapang Belgium-i iba jenjang agitsü telemtetba agiogo.

Paisa, Hamas puri pua alirtem ajak Gaza nungi chiokba, aser Palestine yimsüsüba nung Hamas puri kecha shilem magiba sülenang Palestine ya state ka ama agizükba ya formalize asütsü, ta ashi.

Palestinian Ministry of Foreign Affairs-i, Belgium-i iba osang sangdongba ya pelashishia agizükogo aser tanga linüktem danga parnok sülen anidaka, genocide, aya tzüra, nüburtemi minshiba aser linük atsüngba anendaksütsü aser mangatetep aliba bentettsü atema yimde

yimsüsüba tsütsü lenmang ka lapoktsütsü ayongzükogo.

X nung sangdong ka ajanga minisrty-i ashiba agi, iba jenjang agiba ya international temzüng ozüng aser United Nations bangzüng den tapet aser iba ajanga two-state solution kümzüka ayuba den yimjung asoshi pusemer.

Iba dak sendakba nung Israel sorkari kecha telangzüba magütsü, saka Israel indang opposition Yisrael Beiteinu party lenir Avigdor Lieberman-i ashiba agi, Belgium-i iba telemtetba agiba ya Ato Kilonser Benjamin Netanyahu-i yimden yimsüsüba tsütsü tamakok anguba ajanga lir.



Jakarta, September 2: Indonesia yimtiba nung longkak aiterem aser security force tem tsüngda mangatetep adokba sülen nisung asüba den aika puogo. Nisung 20 samar bushidar.

India & Nigeria nati 2030 Commonwealth Games Host asütsü bid asü

Rongjui/September 2, 2025
(Agencies):

2030 Commonwealth Games ayongzüka asayatsü atema bid asürtem rongnung India kija masü, aser Nigeria-ia iba asayamung ayongzüka asayatsü asoshi temeden bushia bid süogo. Linük anapronglai August 31 nü tatembangbuba anogo matong tsüngda formal bid benokogo.

CWG indang governing body Commonwealth Sport (CS)-i Hombarnü Nigeria-ia parnok indang bid formally benokba jangjatsüogo. Indian Olympic Association (IOA)-i Hokolbarnü sangdong ka ajanga parnoki 2030 CWG atema Commonwealth Sport nem final bid documents agütsüba metetdaksür liasü. India nung iba asayamung ya Ahmedabad nung asayatsü

benokdangogo.

"2030 centenary Commonwealth Games atema bib asütsü 2025 küm August 31 nü tatembangbuba anogo mesüitem tsüngda India aser Nigeria nati bid süogo," ta Commonwealth Sport-i ashi.

Linük anaprongla indang bid ya CS Executive Board-i shima toktsüba Evaluation Commission kati asadangtsü, kong September ita London nung senden ka amenba mapang Candidate Host-i tsüngtong oa presentation agütsütsüba densema lir.

Evaluation Commission-i parnoki ngutetbatem CS Executive Board nem metetdaksütsü aser parnoki November ita Glasgow, Scotland nung General Assembly amenba mapang züngsem linük 74 dangi host ka

bener aotsü.

Evaluation Commission ya CS vice president Sandra Osborne mendenbuba sür inyaksangshidar, shiba federation indang sports committee mendenbuba, Barbados Commonwealth Games Association aser Olympic Committee tir lir.

Commission nung ano CS Executive Board member Helen Phillips, CS Athletes' Advisory Commission Chair Brendan Williams, Glasgow 2026 Organising Company vice chair Ian Reid, Association of Summer Olympic International Federations (ASOIF) indang taoba executive director Andrew Ryan, aser CS Director of Games & Assurance Darren Hall (non-voting member) nung densema lir.

US Open: Swiatek aser Sinner na quarterfinals-i iogo

Rongjui/September 2, 2025
(Agencies):

US Open tetsür kija asaya nung Iga Swiatek-i Russia tsür 12 seed asayar Ekaterina Alexandrova 6-3, 6-1 agi koka quarterfinals tongtetogo. US Open tanabenbuba akoktsü nükjiding nung asayaba mapang iba asaya akokba sülen lai Grand Slam nung asaya 11buba atonga kokogo.

Second seed Poland tsür la ya quarterfinal nung Amanda Anisimova den asayatsü koba Wimbledon final asayashiba ama asütsü. Wimbledon final nung Swiatek-i asaya ya 6-0, 6-0 agi koka liasü. Amanda-i Brazil tsür Beatriz Haddad Maia koka liasü.

Taküm Swiatek-i Grand Slam pezüprongla nung quarterfinal tongogo mesüra iba dang nungi tajungba asayaago aser la Grand Slam tenetbuba akoktsü meranga asayadar.

Kasa asayamung tebur kija asaya nung eighth seed Alex de Minaur-i 6-3, 6-2, 6-1 agi Swiss nung qualifier Leandro Riedi kokogo.

De Minaur-i world number 435 asayar ya amokbanger

asaya aser pai pa indang serve tiben break süa liasü. Pa tang agi trokbenbuba Grand Slam nung quarterfinal tongogo, saka iba adena khen danga asaya mali.

Pa taruba round nung Felix Auger-Aliassime den asayatsü, shibai Andrey Rublev straight sets nung kokogo. Canada nung asayar ya küm asem tsüngda tang mezügbuba Grand Slam ka nung quarterfinal tongtetogo.

Auger-Aliassime-i asaya ya 7-5, 6-3, 6-4 agi akok. Pai Russia nung asayar ya tekubenbuba nung tang agi tanabenbuba-ang kokogo.

Arishi küm 25 tain asayar yagi 2021 küm US Open nung semi-final tonga asayar lir.

Tebur kija asaya nungsa Jannik Sinner-i 6-1, 6-1, 6-1 Alexander Bublik koka quarterfinals tongtetogo. World No. 1 asayar yagi iba asaya minute 81 nung dang koka liasü.

Italy nung asayar yagi taküm Australian Open aser Wimbledon kokogo aser French Open nunga final tonga asaya, saka final nung set pongu kanga toktepba asayaba sülen pai Carlos Alcaraz makok.

Mitchell Starc T20I asaya nungi anisüngzüker



Rongjui/September 2, 2025

(Agencies): Australia nung fast bowler Mitchell Starc-i Test aser ODI nung ranloker asayatsü atema T20 International asaya nungi anisüngzüksü telemtetba agiogo.

Starc-i Australia tenüng nungi T20I asaya 65 nung asaya aser iba mapang wicket 79 agi aser pa iba format nung Adam Zampa sülen wicket timba agiba asayar aliba mapang asaya nungi anener.

Starc-i ashiba agi, pa atema Test cricket ya ajak dang tongtibangba lir. "Ni Australia tenüng nungi T20 asaya ajak jangradema asayaago, talisa 2021 World Cup kanga jangradema asayaago aser aji onoki akokba agi dang masü saka ozü telok jangrademtsüka liasü. Indian Test tour, Ashes aser 2027 ODI World Cup indang bilemdang ni anema lia item asayamungtem nung tajungtiba asayatetsü atema iba telemtetba agiba ya tajungtiba asütsü ta bilemer," ta Starc-i ashi.

Paisa, pai iba telemtetba agiba ajanga Australia nung fast bowler tem nem taruba küm T20 World Cup atema renemtsü asoshi mapang peria agütsütsü,

ta ashi.

Selector tem rongnung tekolakba George Bailey-i Starc nem tenüngsang agütsü. "Pa indang T20 career atema Mitch nema adangtsüla. Pa 2021 World Cup akokba team nung tongtibang asayar ka liasü aser pa dak wicket agütsü tashi aliba ajanga asaya aika melenshidakja aruogo," ta Bailey-i ashi.

Cricket Australia CEO Todd Greenberg-ia Starc-i iba telemtetba agiba pusemogo. "Mitch atema tang pa indang career nung Test aser ODI maneni asayayonga aotsü atema telemtetba agütsü nüngdaker. T20 World Cup atema fast bowler tasentem nem lenmang lapoktsüba ajanga pai team tama südaktsüba tatishitsü sayur," ta pai ashi.

New Zealand den asayamung atema Australia T20 squad:

Mitchell Marsh (c), Sean Abbott, Xavier Bartlett, Tim David, Ben Dwarshuis, Josh Hazlewood, Travis Head, Josh Inglis, Matt Kuhnemann, Glenn Maxwell, Mitchell Owen, Matthew Short, Marcus Stoinis aser Adam Zampa.

Pat Cummins temang nung

timtem aliba ajanga iba asayamung nung masayatetsü. Medical scan agiba sülen pa teberem nung timtem aliba ngutetogo aser pa India den taruba white-ball asayattem nung masayatetsü.

Liverpool-i Alexander Isak pound million 125 agi alizükogo

Rongjui/September 2, 2025

(Agencies): Premier League transfer window shibangtsü lia Liverpool-i striker Alexander Isak pound million 125 agi Newcastle nungi alizükogo, koba asayar ka sen tasaktiba agi alizükba British record lir.

Isak-i Liverpool den küm trok atema tenangzüktepba ka yangluogo.

"Ni otsü tasen yangluner. Ni takok maroktem kokner," ta Isak-i ashi, shiba Liverpool nung jersey number 9 asemtsü.

Isak indang taah yagi 2023 küm Chelsea puri Enzo Fernandez atema pound million 107 agüja otsü tasen ka yanglur aliba ajatetogo.

Liverpool-i August ita pa alizüksü atema pound million 110 agütsütsü benok saka magizük. Ajisüaka Isak iba club nung adentsü temulungtetba tulu aliba ajanga tang iba ya atalokogo.

Summer transfer window nung Isak ya Liverpool-i alizükba asayar tibuba lir. Liverpool puri club indang transfer record tasen ka yanglua Bayer Leverkusen nungi Florian Wirtz pound million 100 agi alizükba aliba tang Isak alizükba agi ajatetogo. Ajisüaka parnoki Crystal Palace nungi England defender Marc Guehi malizüktet.



Liverpool puri tang transfer window nung pound million 400 dak tema intokogo, ajisüaka parnok rongnungia Luis Diaz, Darwin Nunez aser Trent Alexander-Arnold nung densema asayartem ishikati club toktsüogo.

Newcastle-i taoba hopta Germany nung striker Nick Woltemade pound million 69 agi alizükogo, koba club-record fee liasü.

Woltemade alizükba ajanga Isak ayoktsü atema lenmang

lapoktsüogo. Isak-i taoba season tetoktepba ajak nung goal 27 idaktsü aser League Cup final nung Liverpool koka küm 56 sülen mezügbuba takok marok ka anguba nung teyari agüja liasü.

Newcastle-i Isak ayokba taah nungi DR Congo forward Yoane Wissa alizükogo, shiba Brentford nungi pound million 50 agi alizükogo. Arishi küm 28 tain Wissa-i taoba season Premier League nung goal 19 idakja liasü.

BILEMDANGANG

"Aibelenbaji aibelen masü saka aibelenogo ta menangzüktetbaji dang aibelenba mapa lir."